

Noticia
Transparente
di Gobierno

ISLA ONLINE

Diaranson 15 Mei 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**

2 0 2 4



Gabinete Wever-Croes



PROME MINISTER
Evelyn Wever-Croes

DIRECTOR EHECUTIVO DI IMF A DUNA PRESENTACION NA BANCO CENTRAL DI ARUBA



Diamars atardi, Director Ehecutivo di IMF (Fondo Monetario Internacional) a duna un presentacion interesante na Banco Central di Aruba.

Durante e presentacion, señor Hilbers a indica cu e evaluacionnan cu IMF ta haci pa Aruba ta di gran importancia y e resultadonan ta sumamente positivo. Tambe el a subraya riba e areanan unda Aruba por pone mas atencion. Un ta e diversificacion di e economia di Aruba y e otro ta e riesgonan di e cambio climatico. Señor Hilbers a remarca cu e tema financiero di un pais no ta solamente e placa pero e por ta hopi mas cu esey.

Senor Hilbers, riba e mesun dia aki den oranan di mainta, a reuni cu Ministerraad unda el a duna e vision di IMF pa cu e desaroyo di Aruba. Durante e encuentro cu e mandatarionan señor Hilbers a duna palabranan di elogio na Gabinete Wever-Croes y a indica cu Aruba tin un desaroyo positivo y impresionante.

“Tawata un presentacion hopi interesante. Mi ta gradici y felicita Banco Central di Aruba pa organisa esaki. Pa Gobierno, semper ta bon pa haya bon noticia riba e resultadonan di e maneho cu nos ta hibando”, Prome Minister a expresa. ■■■



Prome Minister Evelyn Wever-Croes:


PROME MINISTER A HACI UN RECORIDO RIBA E TERENO DI REFINERIA DI ARUBA

Diaranson mainta 15 di mei, Prome Minister Evelyn Wever-Croes a haci un recorrido riba e tereno di RDA (Refineria di Aruba) pa mira asina diferente aspectonan di e refineria y proyectonan cu ta wordo planifica door di DOW.

Un di e proyectonan ta un caretera cu a wordo proyecta ya un par di aña pasa. E caretera lo pasa a traves di e tereno di e refineria y yega na e area di Colony, Baby Beach y Rodgers Beach y na Secrets Hotel mas lihe. Prome Minister diaranson mainta a haci un ‘site visit’ pa asina haya splicacion amplio di e Proyecto aki.

E mandatario a remarca cu tawata un mainta cu hopi informacion interesante. Por a mira tur e posibilidadnan y lo sigui traha y studia e proyecto aki y mira si tin necesidad di un caretera asina pa conecta e centro di San Nicolas mas lihe y mas efectivamente cu e area turistico cu ta den desaroyo aworaki.

“Mi por bisa cu ta momentonan di melancolia ora pasa door di e refineria y wak con esaki a decai. Pero tambe esey ta muestra e historia di nos pais y awor nos mester concentra riba e futuro di Aruba. Mi ta gradici tur e profesionalnan pa nan tempo y pa tur e informacion cu nan a trece padilanti awe mainta”, Prome Minister a expresa.






MINISTERIO DI NATURALES TA COLECTANDO DATA FUNDAMENTAL PA MANEHO INFORMA



Como parti di e esfuerzo continuo pa cambia nos economia na uno circular, awe mainta Minister Arends a topa cu e ekipo di University of Georgia kende ta hibando a cabo e Circularity Assessment Protocol ariba nos isla.

E iniciativa aki cu ta un cooperacion cu Impact Blue a wordo lansa pa asina haci un coleccion profundo di data fundamental pa nos maneho di desperdicio. Pues durante e ultimo simannan e ekipo a sondea un cantidad di supermercado pa analisa e tipo di productonan cu ta wordo bendi y kico esakinan ta laga atras como desperdicio. E meta ta pa uza e data aki pa asina haya solucionnan a largo plaso y traha manehonan cu ta bon informa.

E caminda pa un economia circular, esta un modelo sin of cu poco desperdicio, ta uno largo y dificil pero cu siguramente ta bale la pena pa cana. Cu stap chikito pero firme Aruba su medio ambiente lo bira uno saludabel. 



MEI 25
7 AM – 11 AM

Limpi
Limpi

BAKI DEN BARIO SANTA CRUZ

NADI CROES & CRISMO ANGELA

ATA FPNC APEX DALTRA BCI SERLIMAR MY
CONTAINERS ECOTECH ECOTECHFZ MINISTERIO
DI NATURALES

LIMPI.AW



MINISTER MADURO TABATA PRESENTE NA E EVENTO 'BAN TOPA' DI ARUBAHUIS PA DUNA UN DISCURSO DI MOTIVACION NA STUDIAANTENAN

Keda semper cu Aruba den boso mente, curason y futuro



Durante su biahe di trabou recientemente na Hulanda, Minister Maduro di Finansa y Cultura a topa cu un grupo di estudiante Arubiano den e 'Ban Topa' organisa pa Arubahuis na Haagse Hogeschool. Un encuentro cu a wordo lidera pa directora di Arubahuis sra. Joslin Croes cu a conta cu presencia di Minister Plenipotenciario sr. Ady Thijsen, Ministernan Glenbert Croes y Xiomara Maduro, directornan di Utilities y RDA, y directora di DRH. E meta di e encuentro tabata pa scucha opinion y preocupacionnan di e hoben studiantenan pa asina Arubahuis por formula maneho pa por brinda e sosten necesario na e studiantenan Arubiano leu fo'i cas.

Pa Minister Maduro e tabata un placer pa por comparti un rato cu nos hobennan cu ta studiando na Hulanda y pa scucha nan preocupacion y nan sugerencianan. Minister Maduro a haci uzo di e ocasion pa asina brinda un discurso di motivacion den cual e mandatario a recorda tur hoben cu bida ta prepara bo semper y ta duna bo pruebanan cu ta forma bo caracter y ta yuda bo haya e habilidadnan necesario pa bo cumpli cu bo metanan. "Tur locual ta wordo haci di bon curason, ta logra. Den cada cos malo cu pasa, tin un les positivo, nos mester tin wowo pa mira esey. Kere den bo mes," tabata algun consejo cu Minister Maduro a comparti cu e hobennan presente. Na final e mandatario a pidi cada estudiante pa semper hiba Aruba



den nan mente y curason, y pa un dia bin bek pa yuda den e desaroyo di nos Pais.

Minister Maduro ta gradici Arubahuis pa e oportunidad aki pa comparti y motiva nos hobennan. Ta hopi importante pa keda den contacto cu nos hoben studiantenan, pa brinda nan atencion, oido, guia y motivacion den e fase importante aki di nan bida, na unda nan ta prepara nan mes pa nan futuro. Minister Maduro ta desea tur hoben estudiante hopi exito cu nan estudio y ta desea pa Aruba por keda forma parti semper di nan pensamiento y nan futuro. ■■■



MEI 2024

Exito na tur estudiante cu
EXAMEN FINAL!



2024

Abo ta nos futuro di mañan.
Aruba mester di boso tur!



Minister di Finansa y Cultura

Kiomara Maduro
Minister di Finansa y Cultura

@MinisterKiomaraMaduro



Durante su bishita na Consejo di Minister:

EXECUTIVE DIRECTOR DI IMF SR. PAUL HILBERS CU PALABRA DI ELOGIO PA E RECUPERACION FINANCIERO Y ECONOMICO DI ARUBA



Diamars mainta Consejo di Minister a ricibi bishita di Executive Director di IMF sr. Paul Hilbers kende tabata tin palabra di elogio pa e manera impresionante cu Aruba a bin ta recupera di e pandemia di COVID-19.

Sr. Hilbers ta forma parti di e board di IMF y a indica cu Aruba ta goza di un bon reputacion cerca IMF. Aruba su economia ta bayendo bon, finansa publico ta wordo maneha basa riba surplus, e debe di Aruba ta bahando, tin estabilidad monetario y financiero, e sistema financiero ta integro y Aruba ta trahando caba pa por mitiga efectonan di cambio climatico. Ta puntonan hopi positivo cu ta wordo mira pa wowo di inversionistanan internacional y tambe pa e turista cu ta scohe pa e estabilidad cu Aruba ta ofrece como destino turistico.

Esaki sigur ta bon noticia pa Aruba y ta e resultado di trabou duro y serio cu a wordo haci pa nos hendenan di Aruba. Minister Maduro di Finansa kier gradici y felicita su ekipo financiero, colega Ministernan, Parlamento y Aruba henter pa e mensahe positivo aki cu ta keda treci pa e Executive Director di IMF. Nos por ta orguyoso di locual nos tur como comunidad ta logrando na bienestar di nos Pais. ■■■



MINISTER MADURO TABATA PRESENTE NA E PREMIER DI SIÑAMI STIMABO 2 - PORDON



Den un Cas di Cultura completamente yen, Minister Xiomara Maduro di Cultura tabata presente pa e premier di e pelicula Siñami Stimabo parti 2 Pordon. Produci pa Marilyn Richardson, e pelicula aki ta conta e storia di diferente famianan cu ta pasa den dificultadnan den nan bida y con nan a haya e caminda di sanacion atraves di pordon.

Minister Maduro ta duna un palabra di felicitacion na Marilyn Richardson y tambe henter e elenco di Siñami Stimabo parti 2 Pordon pa e tremendo pelicula aki y ta invita pueblo di Aruba pa bay sostene e pelicula aki cu desde 25 di april ta na cinema.



Minister di Cultura Xiomara Maduro:

GANADONAN DI COMPETENCIA ESCOLAR DI FOTOGRAFIA - DIA DI HIMNO Y BANDERA 2024 A RICIBI NAN PREMIO



E aña aki Ministerio di Cultura conhuntamente cu Comision Celebracion Dianan Nacional a organisa varios competencia escolar enconexion cu Celebracion di Dia di Himno y Bandera 2024. Esaki a resulta un exito cu participacion di un cantidad di alumno di varios scol.

Recientemente Comision Celebracion Dianan Nacional a entrega premio na e ganadonan. Den e competencia di fotografia pa muchanan di scol basico, e ganado a resulta e hoben Hayzey Arends di klas 4b di Colegio Conrado Coronel. E potret ganado a wordo describi como lo siguiente:

“Mi Aruba stima, ki orguyoso mi ta di tin bo como mi hogar. Cu orguyo mi ta comparti mi cas cu hopi bishitante, cu kier bin admira bo beyesa sin igual. Nos beachnan precioso y nos hendenan caluroso ta haci cu Aruba ta keda e Isla mas gusta y bishita. Na mi Isla e subida y bahada di solo ta algo fenomenal”.

E ganado den scol preparatorio a resulta e hoben Emmanuel Garcia di Scol Preparatorio Cayena. E potret ganado a wordo describi como lo siguiente:

“Mi ta sintimi orguyoso di e bunitesa di nos lama color blau scur bunita, cu ta rondona nos isla. Danki na e lama bunita aki nos tin hopi turista cu ta bin di afo pa disfruta di nos dushi isla. Mi Aruba stima mi ta orguyoso di bisa Arubiano mi ta”.

Ademas cu e muchanan ganado a ricibi nan premio, nan klas tambe ta ricibi un premio. Minister Xiomara Maduro ta felicita e ganadonan y ta gradici un biaha mas tur scol y muchanan pa a participa den e competencianan. Masha danki na e docente y mayornan pa motiva y brinda ayudo na nos muchanan, pa asina nan balora y aprecia mas Nos Dia Nacional, Dia di Himno y Bandera y asina sigui sinti nan mes orguyoso di ta Arubiano.





Competencia Escolar di:

Fotografia



Mi Aruba stima, ki Orguyoso mi ta di tin bo como mi hogar.
Cu orguyo mi ta comparti mi cas cu hopi bishitante. Cu kler bin admira bo Beyesa sin igual. Nos beachnan precioso y nos hendenan caluroso ta haci cu Aruba ta keda e isla mas gusta y bishita. Na mi isla e subida y bahada di sola ta algo fenomenal.
Mi Aruba stima mi ta Orguyoso di bisa Arubiano mi ta.

Canado Scol Basico

Participante: Hayzey Arends
Colegio Conrado Coronel
Klas: 4B



Mi ta sintimi Orguyoso di e bunitesa di nos lama color blauw scur bunita, cu ta rondona nos isla. Danki na e lama bunita aki nos tin hopi turista cu ta bin di afo pa disfruta di nos dushi isla.

Canado Scol Preparatorio

Participante: Emmanuel Garcia
Scol Preparatorio Cayena



BISHITA DI PAHO TAWATA UNO EXITOSO

Awe mainta Minister Dangui Oduber, hunto cu un team di ministerio di Salud Publico y Departamento di Salud Publico (DVG) tawata tin e honor pa ricibi un delegacion di Pan American Health Organization (PAHO). E delegacion a consisti pa dr. Vivas hunto cu su coleganan dr. Haris y sra. Taylor. Nan ta forma parti di e representantenan pa Aruba den World Health Organization (WHO).

E bishita di PAHO tawata entre otro pa Dr. Vivas presenta su credencialnan oficialmente na Aruba su Minister di Salud Publico. Tambe a tuma oportunidad pa papia ariba diferente topiconan cu ta toca salud na Aruba.

A elabora ariba Aruba

- Plan nacional contra malesanan cronico. (NCD)
- Posibilidadnan pa digitalisa e sector di cuido.
- Diferente maneho y programa tumando luga ariba e problematica di obesidad na Aruba, pa asina evita problemanan cu ta bin door di malesanan cronico.


PAHO a muestra hopi interes tambe pa e legislacion cu Ministerio di Salud ta trahando ariba dje cu e meta pa reenforza e sistema di sector di cuido pa cu si tin pandemia den futuro.

Pa hopi aña largo (DVG) y Ministerio di Salud Publico ta trahando hopi di serca cu PAHO. Na aña 2023 Aruba a tene un encuesta cu a yama STEPS2023, cual tawata un investigacion pa haya sa e estado di salud di nos comunidad. Diabierna awo, e resultadonan di e encuesta aki lo wordo presenta oficialmente den PAHO su presencia.

Minister Oduber a tuma e oportunidad tambe pa informa Dr. Vivas di tur e exitonan cu Ministerio di Salud y tambe tur stakeholders den sector di cuido ta logrando den e ultimo añanan aki encuanto prevencion den salud. No por a keda sin menciona e exito di Healthy Lifestyle Center cual ta e centro



pa yuda y guia comunidad di Aruba pa cambia nan estilo di bida pa uno saludabel. Ya caba tin 2 di e centronan aki cu ta yudando mas cu 500 cliente.

PAHO a confirma di sostene Aruba den tur programa cu tin de haber cu prevencion den salud. Dr. Vivas a keda masha impresiona cu Aruba su progreso trahando ariba prevencion den salud. 

FELIZ DIA INTERNACIONAL DI FAMIA

"Famia ta mas cu un vinculo biologico, e ta un fuente di forza, resiliencia y amor cu ta traspasa fronteranan y ta duna forma na nos sociedad"

Diaranson 15 di mei ta dia Internacional di Famia. Esaki sigur ta un oportunidad pa refleha riba e importancia di famia den nos bida y den nos comunidad. Famia ta mas cu un vinculo biologico, e ta un fuente di forza, resiliencia y amor cu ta traspasa fronteranan y ta duna forma na nos sociedad. Famia, grandi of chikito, tur ta unico y cu nan mesun storia. Sea cu bo a nace of a scoge pa ta den bo famia, e esencia lo keda mescos, famia ta e pilar di amor, sosten y comprension.

Sinembargo, den e agitacion di bida diario, ta hopi facil pa desconecta di famia. Pero, ta durante momentonan di alegria y triunfo y tambe e forza y solidaridad cu ta existi durante momentonan di desafio, cu nos ta aprecia berdaderamente e importancia di vinculonan familiar. Den e momentonan aki famianan ta muestra otro sosten.


Famianan di Aruba a muestra nan fosra y resiliencia durante e temporada di desafio di e pandemia. Famianan a lanta mas uni y fuerte, cu mas resiliencia y compacion cu otro y cu demas famianan na Aruba. Demostrando nan amor y solidaridad, superando obstaculonan cu determinacion. Hunto, como famia y como sociedad, Aruba a transforma momentonan di adversidad den oportunidadnan pa crece y fortalece e vinculonan familiar. Mientras cu mundo henter a nabega den awanan bruto di e pandemia, famianan a sirbi como ankernan, y a provee estabilidad y tranquilidad den e incertidumbre cu mundo henter tawata pasando aden.

Esaki awe, ta sirbi como un

recordatorio pa nos tur, cu di berdad hunto nos ta mas fuerte. Mientras nos ta reflexiona riba e caminda cu nos ta awe, riba e resiliencia y solidaridad cu nos a demostra, riba e desafionan cu nos a pasa aden, laga nos semper corda, cu den unidad y amor, determinacion y vision, forza y resiliencia, nos por supera cualkier desafio cu bin den nos caminda.

"Mientras nos ta celebra Dia Internacional di Famia, laga nos tuma un momento pa expresa gratitud pa e amor, guiansa y sosten cu nos famianan ta provee. Laga nos keda comprometi pa sigui brinda sosten, amor y forza na nos famianan, awe y tur dia", Prome Minister Evelyn Wever-Croes a expresa.






MINISTER ENDY CROES A RICIBI E CONSEHO FINAL DI E COMISION CU A TRATA E STRUCTURA DI SALARIO DI E DOCENTENAN

Siman pasa, Minister Endy Croes a atende reunion cu Comision di Restrucion Salarial di e Maestronan. Manera ta conoci, e comision aki a ser estableci na inicio di october 2023 a traves di un Ministeriële Beschikking (MB). E comision ta consisti di un representante di Ministerio di Enseñansa y Deporte y abogado Sr. Milko Baiz, directora di Departamento di Enseñansa Aruba (DEA) Sra. Anne Marie Proveyer, director di Dienst Uitvoering Onderwijssubsidies (DUOS) Hervé Ruiz, presidente di SIMAR Sra. Angelique Quijada y register accountant Sr. Franklin de Kort.



Durante e encuentro cu e comision aki a trata posibel modelonan y structura moderno di salario pa e docentenan y otro temanan importante riba e veld di enseñansa. E mandatario di Enseñansa a indica cu el a ricibi e conseho final firma cu ta conta cu sosten di tur cinco (5) miembro di e comision esta, SIMAR, Departamento di Enseñansa, abogado, DUOS y register accountant. Minister Endy Croes a enfatisa cu manera a atende cu indexering asina e ta desea di atende cu cuestion aki. E mandatario di Enseñansa ta cauteloso y no a bay den detaye di e conseho cu el a ricibi. E conseho tin un proceso pa cana, e siguiente paso ta pa pidi conseho di Departamento Recurso Humano (DRH).



ehempel ta e deseo ta pa baha e cantidad di mucha den klas di 28 pa muy probablemente 24 mucha den klas.

Minister Endy Croes a indica cu mester busca espacio financiero y despues lo presenta esaki na Consejo di Minister. "Ohalá cu dia trata e Presupuesto di Pais Aruba pa aña 2025 na luna di december proximo, por tin algo concreto y tin un espacio adicional banda di 11.7% di indexering cu e docentenan a ricibi", Minister Endy Croes a expresa. Banda di esaki, Departamento di Enseñansa tin un comision cu ta trahando riba e "richtlijnen" nobo pa enseñansa den su totalidad. Un

Minister Endy Croes a indica cu pa luna di juni of juli proximo e lo ricibi e conseho final di e "richtlijnen" nobo cu lo regula diferente aspecto den enseñansa na beneficio di e docentenan. Minister Endy Croes a subraya un bes mas cu e ta aprecia e gran trabou cu e docentenan ta haci den nos comunidad. Pa conclui, minister di Enseñansa a indica cu e ta trahando duro pa mehora diferente aspecto den enseñansa. [#Aruba](#)

Minister Endy Croes:

DIASABRA, 8 DI JUNI PROXIMO, ARUBA LO ENFRENTA CORSOUS DEN FIFA WORLD CUP QUALIFIERS DEN STADION GPT NA DAKOTA



Recientemente, durante conferencia di prensa, Minister di Enseñansa y Deporte Endy Croes hunto cu presidente di Arubaanse Voetbal Bond (AVB) Sr. Randolph Lacle, Sra. Dyane Wiersma y Sr. Raymbert Bikker di AVB a anuncia oficialmente cu e wega clasificativo di CONCACAF lo tuma luga dia 8 di juni proximo den Compleho Deportivo Guillermo Prospero Trinidad, unda cu Seleccion di Aruba lo enfrenta e Seleccion di Corsou. E interes pa FIFA World Cup Qualifiers ta hopi grandi, tanto nacional- como internacionalmente. Recientemente, a haya bishita di e representantenan di CONCACAF cu a bin wak con e trabounan ta andando den stadion Dakota y a laga un lista di posibel factornan cu mester atende.

A inverti mas di 5 miyon florin den renobacion di stadion na Dakota pa cumpli cu e standardnan di FIFA y CONCACAF. Despues di e wega tan spera aki dia 8 di juni, lo cera e stadion bek pa finalisa cu e trabou di renobacion. Sra. Wiersma a indica

cu nan ta trahando duro pa haci e partido aki uno exitoso. Tambe a informa cu lo tin un pre evento, den cual lo duna mas detaye durante siman a traves di nan medionan social.

Fuera di esaki, Sr. Bikker a indica cu tanto prensa di Aruba, Corsou y Hulanda tin un interes hopi grandi den e wega aki. Durante siman lo comparti un flyer, unda cu tur prensa por registra pa nan haya un badge pa cubri e wega. Sr. Bikker a sigui bisa cu no lo permiti pa trasmiti e wega en bibo, mirando cu tin un derecho di transmision mara na esaki.

Ticket pa entrada ta disponibel caba riba Pay.aw, na Urataka Center y Citgo na final di Caya Grandi. Minister Endy Croes y AVB ta invita Pueblo di Aruba pa bin apoya nos Seleccion Masculino di Aruba dia 8 di juni proximo, cuminsando 8 or di anochi den FIFA World Cup Qualifiers den Stadion GPT na Dakota. ■■■■

MINISTER ENDY CROES A HIBA PALABRA NA APERTURA DI E SIMAN DI CURSO DI SINDICATO TOPA



Dialuna mainta, a tuma luga apertura di e siman di curso pa e miembranan di sindicato Trahadornan Organisa di Sector Publico di Aruba (TOPA). E curso ta titula: 'Ciclo di Formacion Sindical'. E curso tin duracion di un siman y ta facilita pa Sr. Juan Diego Gomez Vasquez, kende ta experto sindical y representante di PSI na Colombia.

Minister Endy Croes tabata presente y a hiba palabra, unda el a desea e participantenan hopi exito y cu nan siña hopi di e curso aki. "E sindicalistanan ta forma un parti fuerte di nos comunidad y mi ta sigur cu e herment- y consehonan nobo lo ta un estimulo pa engrandecé boso conocimiento ora di negocia y pa esaki por sosode den e miho forma posibel", Minister Endy Croes a expresa. Hopi Exito! ■■■



MINISTER THIJSSEN A TENE CHARLA NA SIMPOSIO 70 AÑA DI STATUUT

Na Universidad di Utrecht a tuma lugar un simposio den cuadro di 70 aña di Statuut di Reino Hulandes. E simposio a conta cu diferente oradornan, manera ex Staatsraad na Raad van State Milly Schwengle y prof Gerhard Hoogers, director di Gabinete di Gobernador di Sint. Maarten. Minister Plenipotenciario di Aruba mr. Ady Thijsen tabata tin e honor pa a habri e simposio cu un discurso.

Minister Thijsen den su discurso a repasa e historia di e Statuut cual a keda firma na 1954. Despues di e fecha tabata tin diferente momentonan cu adaptacion pa medio di amendiana a wordo treci den e Statuut.

E mandatario a bisa den su discurso cu un regla basico di Statuut ta cu tin un nacionalidad pa tur habitante di Reino Hulandes, un hefe di estado, un maneho di asuntonan exterior y defensa comun. Cooperacion riba diferente tereno ta posibel, pero cada pais autonomo ta regula su mesun asuntonan interno. Mientrastanto segun sr. Thijsen a constata cu den Reino Hulandes ta existi un deficit democratico. Thijsen: 'E deficit democratico den Reino a wordo defini door di Raad van State na 2001 cu "ta falta un representacion democratico igual y completo di e poblacion di Reino Hulandes den decision riba nivel di Reino". E falta di igualdad completo di e cuater paisnan den Reino basicamente ta contra e principio di igualdad (gelijkheidsbeginsel) cu ta ancla den e constitucion di hopi democracianan.

E POK (Parlementaire Consultatie Koninkrijksrelaties) na 2008 a pidi e Comision Deficit Democratico pa bin cu un relato riba e legitimidad di e proceso di tuma decision den Reino. E comision aki na 2009 a bin cu nan raport "Kiezen voor het Koninkrijk". Minister Thijsen: 'Lamentablemente no tabata tin hopi atencion pa posibel deficiencia y solucionnan cu e comision a identifica, entre nan cu no tin un Parlamento di Reino y tambe e instalacion di un Corte Constitutional pa regla disputa (geschillenregeling) entre e paisnan.'

E posicion di Aruba bou di Statuut ta cla! Nos ta kere den un Reino fuerte unda nos por convivi, traha hunto, tuma decision hunto y carga hunto e responsabilidad pa medio di un bon realizacion di e medionan disponibel den cuadro di e "Onderlinge Regeling Samenwerkingshervormingen". Tambe un Areglo di Disputa conforme articulo 12 di Statuut y e mocion



Van Laar unda structuralmente ta haci uso di articulo 17 di Statuut, unda banda di e derecho di entrega mocion y amienda, e delegadonan special di Aruba, Curaçao y Sint Maarten ta haya derecho pa vota den e caso di tratamiento di Leynan di Reino (Rijkswet). Esaki ta nifica cu lo mester adapta articulo 12A di Statuut. Ta haci 14 aña cu e amienda Wever/Thijsen cu 140 voto na favor a keda aproba den Tweede Kamer al respeto di e Areglo di Disputa. Den e siguiente lunanan nos lo bin cu un proposicion pa un Ley di Reino (Rijkswet) encuanto un Areglo di Disputa segun articulo 15 lid 3 di Statuut,' segun Minister Thijsen.

Finalmente e mandatario a bisa cu lo mester adapta articulo 36 di Statuut pa duna mas contenido na ayudo y sosten na otro y cu e Statuut ta keda di importancia pa tur pais den Reino y pesey e Statuut lo mester encera igualdad y husticia den Reino Hulandes. ■■■

2024

AÑA DI STABILIDAD Y PROSPERIDAD



Gabinete Wever-Croes

Ora nos cana den cayanan di San Nicolas cu ta dorna cu artenan mahestraal aki, nos ta realisa cu bunitesa por wordo haya den luganan menos spera. Arte di muraya ta e language visual cu ta conecta culturanan, na unda cu por aprecia historia, color, fantasia y dedicacion.

